

Banjir: Bomba sentiasa siap sedia

SHAH ALAM - Jabatan Bomba dan Penyelamat Selangor serta Kuala Lumpur bersedia menghadapi kemungkinan berlakunya banjir kilat disebabkan hujan lebat hampir setiap hari sejak seminggu lalu.

Penolong Pengarah Operasi Bomba Jabatan Bomba dan Penyelamat Kuala Lumpur, Azizan Ismail, sudah mengarahkan anggota bomba daripada 17 balai bomba dari seluruh Kuala Lumpur melakukan operasi menyelamatkan jika berlaku banjir.

Katanya setakat ini mereka belum menerima panggilan mengenai insiden banjir.

"Biasanya di Kuala Lumpur, kawasan yang sering dilanda banjir kilat ialah Sentul,

Gombak, Jinjang, Klang Lama dan sekitar Jalan Tun Razak," katanya.

Sementara itu, Timbalan Pengarah Bahagian Operasi Jabatan Bomba dan Penyelamat Selangor, Mohd Sani Harul berkata, pihaknya sudah menerima beberapa panggilan kecemasan mengenai banjir kilat dan pokok tumbang sejak dua minggu lalu.

Semalam, bomba Selangor menerima panggilan di Teluk Panglima Garang, Klang dan Taman Selayang, Batu Caves.

"Kami sudah siap sedia dari segi peralatan untuk digunakan untuk operasi banjir seperti bot, pelampung dan jaket keselamatan," katanya.